

东鲁颜氏三修族谱序（山东）

颜氏之有家乘也，其所由来旧矣。盖后世之勒勋名者，必正仪型于祖考，先世之树恩德者，必待表章于子孙。此谱系之不可不修也明矣。溯自黄帝裔孙名晏安者，为曹姓，国于邾，更唐虞夏商，不能纪其传。至周武王克殷，封其裔佚为邾子，佚递传至邾武公，名夷甫，字伯颜，为鲁附庸，有功于齐，齐威公别封其子友于倪，曰小邾子。友遂因以颜为姓。颜之得姓盖昉诸此。以其附庸于鲁，故历为鲁卿大夫。夹叶相传，以至无繇，无繇字路，路生子渊，父子先后师事孔子。子渊德冠四科，为圣门高弟，历代封赠有加，屡祀不绝。历唐宋元明以迄于今，或封侯，或赠公，或尊先师，或谥复圣，先大贤之享荣号于后也，亦甚燁赫矣哉！厥后继先大贤而起者，代不乏人，为之节举其略。如京兆尹之流传善政，关内侯之孝弟名里，大中大夫之深明易礼书诗，此其最章章者矣。至弘都公之诚感兄梦，入棺复苏，君道公之匍匐父丧，抱枢息焰，见远公因和帝暴崩，不食恟殒。孝子忠臣屡见于册，俱足为先大贤增辉映后者也。若撰日月灾异诸书，著家训证俗等篇，讲论经义，校订书史，工篆籀，精训诂，及九河高松作赋，当场黄土扫壁，草圣擅名，其克嫻文字者，又不一而足。颜氏何多俊杰也！洎昕门公讳杲卿者，与兄春卿、弟耀卿，正色立朝，举劾无所回避。后因安禄山之乱，骂贼钩舌而死。令嗣季明公俱为贼所害。呜呼！生为国士，死为忠臣，父子，其克振家声者矣，逮去惑公之诗判，令乾公之精班汉，俱哉碑记，口不具数。以及清臣公博学宏词，历官至鲁郡开国公，食邑二千户，缘李希烈叛，毒虐万计，胁公改节，公抗志不从，遇害于龙兴寺。与昕门公一门忠孝，千古无双。凡先世有功德者，公俱作碑铭以表之，令狐岵神道一碑，又足为公志不朽矣！此在唐之最表表者。迨五季之乱，宗支离散，唯四十五代孙文威、文蕴、文铎兄弟，或隐鲁之峯山，幸存于鲁。至周太祖广顺二年，行在

曲阜，以鲁国公后四十六代孙涉授曲阜县主簿、衍为户部尚书。后仲昌公至淳化二年（公元991年），讲五经赐第。太初公号鳧绎先生，子复，字长道，为东鲁名儒，其余或显于宋，或仕于元，或通籍于明，以勋业著闻者，难以枚举。沿至五十九代希仁公，号景哲先生，时在正统十一年（公元1446年），钦定主奉祀事，维修祖庙。御制鼎新追崇之典，于斯为烈。诎后颜希惠诈称嫡宗，冒受翰林院五经博士，以伪杂真，是非大乱。至天顺五年，希仁公长子议赴京具奏，行巡按山东御史改正，将希惠革职，令议承袭奉祀。维时天子幸学，取孔颜孟三氏子孙陪祀，冠带赐宴，又赐第宅于京，入觐驰驿，定为常例。其后嫡宗世袭翰林院五经博士，主奉祀事，处明迄清，未之或改。此颜氏家世之大凡也。因思我颜氏自先大贤而下，忠臣烈士，孝子悌弟，振古铄今，辉映前后，历代恩礼之隆，自大圣人之后，卒无有过此者。后世子孙为大贤之后，则当法大贤之行，食大君之禄，则当忠大君之事。且文献家乘，匪异人任也。今博士孙砬世，恐谱系散失，支派混淆，重为修辑。时问序于敏。敏备员西藩，自分谫劣，不能为清臣公作神道碑铭以阐扬先烈，然表章之责，舍敏谁归？故于先人之德行最表著者略为序述。其绩懋于前，名垂于后，载在家乘，班班可考，使后世子孙观是谱者，既识先大贤之所由来，复知后继之所由正。则博士孙砬世修明之功甚伟，而布政孙敏亦得润微音于万一也。岂不幸哉！

清圣祖康熙五年（公元1666年）岁次丙午春正月朔 谷旦

六十五代孙赐进士第资政大夫陕西布政使司左布政使颜敏谨序

